

ARTIKEL KESELAMATAN JALAN RAYA: SELAMAT SAMPAI KE DESTINASI, INSYAALLAH!

Segala puji bagi Allah Taala yang banyak memberi kita nikmat di dalam kehidupan dan nikmat yang terbesar tentunya anugerah Iman dan Islam. Seterusnya, kita mensyukuri nikmat kehidupan yang Allah Taala kurniakan kepada kita di zaman ini kerana begitu banyak manfaat diperoleh daripada ilmu pengetahuan sains dan aplikasi teknologi yang semuanya memudahkan kehidupan kita, Alhamdulillah. Secara langsung, segala kurniaan tersebut menyenangkan kita untuk melaksanakan perintah Allah Taala dan menuruti Sunnah Rasulullah di dalam kehidupan seharian.

Termasuk di dalam nikmat kehidupan di zaman ini ialah terciptanya pelbagai kenderaan yang membolehkan kita bergerak dari satu tempat ke tempat yang lain dengan cepat, selesa dan selamat. Berbanding dengan zaman dahulu yang hanya menggunakan tenaga haiwan sebagai kenderaan. Ini sesuai dengan firman Allah yang bermaksud: *“Dan sesungguhnya Kami telah memuliakan anak-anak Adam dan Kami telah beri mereka menggunakan berbagai-bagai kenderaan di darat dan di laut dan Kami telah memberikan rezeki kepada mereka dari benda-benda yang baik-baik serta Kami telah lebihkan mereka dengan selebih-lebihnya atas banyak makhluk-makhluk yang telah Kami ciptakan”* (Surah Al-Isra’ 17:70).

Allah Taala juga berfirman yang maksudnya: *“Dan Kami ciptakan untuk mereka, jenis-jenis kenderaan yang sama dengannya, yang mereka dapat mengenderainya.”* (Surah Yasin 36: 42).

Namun, dengan kenderaan terkini yang boleh bergerak laju dan memecut sehingga kadangkala melebihi halaju yang ditetapkan boleh saja mendatangkan mudarat kepada penggunaannya dan pengguna jalan yang lain. Jika berlaku pelanggaran, momentum dan tenaga impak besar yang terhasil dari kelajuan kenderaan boleh menyebabkan kerosakan teruk terhadap kenderaan dan perabot jalanan. Ia juga boleh mengakibatkan kecederaan serta kematian. Risiko yang besar ini tentunya membawa kebinasaan kepada pengguna kenderaan dan jalan raya sedangkan Allah Taala memerintahkan kita untuk menghindari kebinasaan, sebagaimana firman-Nya:

“*dan janganlah kamu sengaja mencampakkan diri kamu ke dalam bahaya kebinasaan*” (Surah al-Baqarah, 2:195). Syariat yang Allah Taala turunkan kepada kita juga adalah bertujuan untuk memelihara harta dan nyawa.

Selain memandu dengan laju, risiko lain yang berpotensi mengakibatkan kemalangan ialah memandu di dalam keadaan letih dan mengantuk. Keadaan ini biasa terjadi terutama ketika sedang berpuasa. Mengantuk boleh mengakibatkan ‘*micro sleep*’. Walaupun hanya dua saat, ia sudah memadai untuk mengakibatkan kenderaan yang dipandu hilang kawalan seperti tidak sempat diberhentikan sehingga melanggar kenderaan depan atau tersasar dari lorong jalan dan memasuki lorong jalan yang lain. Oleh itu, sangat penting bagi setiap pemandu memastikan dirinya sentiasa berada di dalam keadaan cergas dan berwaspada.

Maka, di dalam kita mensyukuri nikmat Allah Taala yang dikurniakan kepada kita seperti nikmat kenderaan yang baik dan selesa, perlu juga untuk kita sentiasa memelihara dan berhati-hati di dalam menggunakan nikmat kenderaan tersebut agar kita terhindar dari segala mara bahaya yang mungkin terhasil darinya. Memandu sehingga melebihi had laju yang ditetapkan dan dalam keadaan letih serta mengantuk adalah contoh pemanduan berbahaya paling tipikal yang sering ditemui dalam kalangan pemandu di negara kita. Sikap ini wajib dihindari bagi mengurangkan dan menghilangkan risiko berlakunya pelanggaran di jalan raya.

Semoga perjalanan kita pergi dan balik dari kampung halaman di dalam bulan yang mulia ini serta di hari raya yang berbahagia nanti sentiasa di dalam pemeliharaan Allah Taala dan selamat kita sehingga sampai ke destinasi, Insya-Allah!

“*Maha Suci Tuhan yang telah memudahkan kenderaan ini untuk kami sedang kami sebelum itu tidak terdaya menguasainya.*” (Surah al-Zukhruf, 43: 13).

Penulis:

Ts. Dr. Iskandar bin Abdul Hamid

Pegawai Penyelidik,

Kluster Penyelidikan ‘*Islamic View on Road Safety (IVORY)*

Institut Penyelidikan Keselamatan Jalan Raya Malaysia (MIROS)

Dr. Wan Haslan bin Khairuddin

Pensyarah Kanan,

Pusat Kajian Usuluddin dan Falsafah, Fakulti Pengajian Islam,

Pengarah Pusat Islam, Universiti Kebangsaan Malaysia (UKM).

Tel: +603 8921 5521 Email: wanhaslan@ukm.edu.my